

Guangjisi Minzcu Bau

ganbbau: CN45-0036 B.2015 Nd.12 Ng.30 liggaueq ietfeih nienz ndwenit ngeihcib

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3205期

Denhdwngj Yen Cauxlaeb Aen Daih' it Gihdi Hwngfat Vwnzyi Yingjsi Vahcuengh

天等县建成首个壮语影视文艺发展基地

12 nyied 18 hauh, Denhdwngj Yen aen daih' it gihdi hwngfat vwnzyi yingjsi Vahcuengh youq Denhdwngj Yen Vwnzva' gvanj laebbaenz, neix hauh' ok Denhdwngj Yen vwnzyi yingjsi yamq haeuj duenh roen moq, vih Denhdwngj Yen hong minzcuz caiq gya diemjrongh.

Bineix daeuj, aen yienh neix yawjnaek hong vwnzyi yingjsi Vah-

cuengh, cauxmoq lohnaemj, gya-gvangq monzloh, damqra yienghsik moq. Denhdwngj Yen Minzcuzgiz ginggvaq lai baez caeuq Yen Vwnzva-gvanj doxyaeng doengzeiq, youz Yen Vwnzvagiz daezhawj ciengzdieg, Minzcuzgiz fucwz cawx sezbei. Vih guh ndei gihdi cauxlaeb, Swcigih Minzyijveij anbaiz cienz cienhangh 3 fanh maenz guh baujcaeng, gihdi

cauxlaeb le hawj Yen Vwnzvagiz fucwz ngoenznaengz hongsaeh vwnzyi yingjsi Vahcuengh hagsib doxyau, beizyin gyauqlienh daengj, doiq swnjcienz minzcuz vwnzva, doedok minzcuz vah saw vwnzva goengnaengz, gya' gvangq vah saw minzcuz ndaw-biengz sawjyung miz cozyung youq-gaenj.

(Vangz Souciz/黄寿积)

Sanhyangh: Gaiq Daihcibngeih Ciet Dohyeh Dungcuz Haimuq

三江: 第十二届侗族多耶节开幕



12 nyied 26 hauh, Sanhyangh Dungcuz Swciyen gaiq daihcibngeih ciet dohyeh Dungcuz Cungguet haimuq, beixnuengx Dungcuz laemxcingz yienj bak vnz golaux Dungcuz, bak vnz foux aenvenz, ngaiz-bakraiz gairongh-ndwen, cien vnz dohyeh daengj minz-suz lai yiengh ndeiawj, yinx ndaej haujlai hekyouz cam-gya. Ndaw doz dwg beixnuengx Dungcuz biujyienj gofoux Dungcuz.

(Vangz Swhcang/王滋创)

Lungzswng Haenqrengz Doicaenh Saujsu Minzcuz Vwnzva Swnjcienz Baujhoh

龙胜大力推进少数民族文化传承保护

Vihliux ndaej cungfaen baujhoh caeuq vatcimh minzcuz vwnzva, Lungzswng Gak Cuz Swciyen laebbaenz cienmonz gihgou, youq gvaengxlaengx daengx yienh haiguh feihvuzciz vwnzva yizcanj bujcaz, gungh soucomz sawfwngzcau ca mbouj geijlai 400 fanh cih, swhliu loegyaem 22 gienh, swhliu dozsiengq 287 faenh, swhliu gizyawz 35 faenh. Laebbaenz cienmonz feihvuzciz vwnzva yizcanj baujhoh cungsim, soucomz gak cungj feihvuzciz vwnzva yizcanj mingzloeg 1043 aen. Gonqlaeng okbanj le《Fwen Ndawbiengz Minzcuz》、《Gojgaeq Ndawbiengz Lungzswng》、《Lungzswng Fungeingz》daengj saw. Okbanj doenghgij saw neix, doiq baujhoh

caeuq hwngfat Lungzswng minzcuz vwnzva ndaej miz gaenxmaenx coicaenh cozyung.

Aen yienh neix lij haiguh minzcuz vwnzva haeuj hagdangz, angqhoh ngoenzcienz minzcuz hozdung, vah minzcuz yienjgangj doxdax daengj lai cungj lai yiengh baujhoh hozdung, hawj minzcuz vwnzva ndaej swnjcienz fatyengz. Doengzseiz, aen yienh neix aeu minzcuz vwnzva caeuq lijyouz canjnieb giethab hwnjdauj, guhbaenz cungj lijyouz canjnieb aeu minzcuz vwnzva guh cawj he. Gaenh geij bi neix daeuj, aen yienh neix mboujduenh okyienh gak cungj aenmbanj saujsu minzcuz miz daegsaek, yinzvwnz minzsuz gingj-

gvanh gig miz daegsaek baenz le gizyunghrengz dieg saujsu minzcuz ginghci hwngfat he.

Vihliux ndaej engqgya ndei baujhoh swnjcienz feihyiz vwnzva, aen yienh neix laebbaenz le minzcuz vwnzva baujhoh caeuq hwngfat hanghmoeg cijveihbu, bued roengz cienz cienyung, vatcimh baujhoh feihyiz vwnzva, cingj bouxcienieb daeuj son minzcuz yisuz, coicaenh minzcuz vwnzva haeuj segih, haeuj hagdangz; aen yienh neix binaengz lij banh ciet vwnzva nazmbaeklae Lungzciz, engq dwg daezhawj aen daizheiq vih minzcuz vwnzva hwngfat doxyau he.

(Lungz Cwng/龙政)

SIUSIK DINJ

简讯

● 12 nyied 25 hauh, Yiz-couh Si Daihsam Siujyoz ndaw hagdangz sing fwen haprwenz, gyoengq hagseng hopheux seveicujyi hwzsinh gyacizgvanh neiyungz eu ok baenz hot baenz hot fwen, youq seiz gaiq daih' it ciet hagdangz vwnzva yisuz biujyienj, yinx ndaej daengx hagdangz lauxsae hagseng daeuj dingq yawj, ndaej daengz gyoengq bouxyawj bekwngz haenhndei.

(Veiz Canghyoz Cangh Gifaz)

● 12 nyied 26 hauh, Ningmingz Yen Caianh Yangh Caianh Cunghyoz banh bi 2016 yenzdan vanjvei. Minzcuz diuq-foux, hagdangz siujbinj, hagdangz heiqsimleix daengj lai cungj vwnzyi hingzsik vih gyoengq hagseng daezhawj aen daizheiq baijyienj dungxcaiz he, fungfouq le hagdangz vwnzva saedceij, ndaej daengz haujlai lauxsae hagseng angqcoux.

(Couh Yizgangh Cwng Cunghswng)

● Bineix daeuj, Nazboh Yen Minzcuzgiz giethab haiguh "sam yiemz sam saed" ciendaez gyauyuz hozdung, gaenxmaenx ceng' aeu gaep baihwngz cienz hwngfat saujsu minzcuz, bineix gungh ceng' aeu ndaej baihwngz cienz cienhangh 1000 fanh maenz, yunguh guh gwnraemx hanghmoeg, vwnzva hozdung ciengzdieg daengj.

(Yi Yezvaz Lungz Yici)

● Mboengqneix, Yungzsuij Myauzcuz Swciyen Minzcuz Siujyoz banh minzcuz doxgiat cihsiz doxdax hozdung, doenggvaq banh doxdax hozdung, hawj gyoengq hagseng roxyiuj gij yiyi youqgaenj minzcuz doxgiat, gyagiengz le doiq daengx hagdangz lauxsae hagseng minzcuz doxgiat gyauyuz, hawj lauxsae hagseng roxyiuj minzcuz cihsiz caeuq gak cuz fungsug sibgveng, laeb ndei minzcuzgvanh, gunnganq minzcuz doxgiat yisiz.

(Fung Sauswh Veiz Yungzcunh)

● Bineix 10 nyied daeuj, Lozcwngz Mulaujcu Swciyen hainduj comz rengz hwnjguh loh doeng mbanj, yienh caizcwng moix bi bued ngaenz 3000 fanh maenz, yunguh guh lajmbanj loh doeng mbanj, ceng' aeu yunguh 2 daengz 3 bi seizgan, saedyienh daengx yienh aen mbanj miz 20 ranz doxhwnj haenx cienzbouh hawj doeng lohsuijniz roxnaeuz lohbwyouz.

(Se Sunhwngz)